

I. N. SS. T.

DISSERTATIO MEDICA

De

# CLYSMATIBUS,

Quam

Sub SACRO SANCTÆ TRIADIS Umbone

PRÆSIDE,

*Viro Nobilissimo, Amplissimo, Excel-  
lentissimo,*

DN. ELIA RUDOLPHO CA-  
MERARIO. Phil. ac Med. Doct. & Pra-

xeos P. P. Ordinario, Facultatis h. t. Decano, Sereniss.

DUCIS Württembergiæ Consiliario atque  
Archiatro,

Dn. Patrono & Præceptore suo omni observantiæ cultu  
æviternum colendo,

*Publicè in Medicorum ἀγοατῆς ἵα ventilandam  
proponit*

JOH. MATTHÆUS BRIGELIUS,  
REUTLING.

Ad diem 22. Junii, horis consuetis.

T U B I N G Æ,

LITERIS ROMMEIANIS,

ANNO M DC LXXXVIII

V I R O

*Amplissimo, Prudentissimo,*

DN. JOHANNI SCHÖNFEED/

Inclutæ ac Liberæ S. R. I. Reipubl. Biber-  
racensis Consilii Interioris Assessori, Dn.  
Cognato & Patrono suo ætatem hono-  
rando,

*Ut Et*

DN. GOTTOFREDO BRIGE-

LIO, Pharmacopolæ in Urbe Antiquis-  
sima Libera Imperiali Reutlinga Expe-  
rientissimo, Parenti suo filiali cultu pro-  
sequendo, amando.

*In*

Debitæ gratitudinis tesseram,  
Filialis Obedientiæ pignus,

Primitias hæcæ Studii Medici

*Offert  
Consecrat*

A. & R.



Σὺν τῷ ἡμῶν Ἱατρῷ Χριστῷ.

## P R Æ F A T I O.

**S** I ullum Medicamenti genus exploditur vulgo atque exhibilatur, Clysma est, utpote quod non solum à *Paracelso*, *Helmontio*, & qui hujus Gregis sunt, tanquam remedium belluinum ab ave doctum, fædum & pudibundum, quia illis partibus, quæ non nisi cum præfatione veniæ nominandæ, applicatur, turpissimè traducitur; sed & ab Antiquis *Legislatoribus* è foro Medico per Publicum Edictum eliminatum fuit, hac concepta Legis formula: *Si quis per vim, vel suasum, medicamentum alicui infundit, vel ore, vel Clystere, vel si eum unxit malo veneno, Lege Aquilia tenetur.* L. 9. §. 1. ff. ad leg. aquil. Verùm non hæc me terrent, quò minùs Patrocinium hujus salutaris inventi suscipiam; cùm & sana ratio dicat, Naturalia non esse turpia. Audiatur Curios. *Schröck. in Schol. ad Helvvig. Obs. Phys. Med.* 23. partibus naturalibus ita patrocinians: *Neutiquam deest partibus obscenis dictis suis nitor & elegantia, qua vel cum aliis partibus decertare, palmamq; dubiam reddere valent.* Nihil dicam de summo necessitatis telo, quod omnem vincit turpitudinem, omnemque tollit pudorem, præsertim ubi æger non aliter ex faucibus Orci eripi, & ab extremo vitæ periculo liberari potest; adeò ut meritò *Gabelkov. cent.* 4. *Obs.* 95. eos reprehendat, & stultissimè, dico impiè, agere censeat, qui pudicitiae rationem habentes, Creaturam Dei negligunt, & perire sinunt. Quod attinet superius citatam Legem de Interdicto Clysterum, Contextus non de medicamento salutari, sed de noxio, dra-



stico Legem loqui probat, cùm non solùm venenum exprimatur malum, sed & vocem medicamenti *Φαρμάκον* aliquando venenum notare, Medicis Antiquitatis studiosis pateat. Et posito de Clysteribus in genere loqui, illa nequaquam Medicos Rationales ferit, sed Agyrtas saltem, Circumforaneos, Blaterones, Impostores, & reliquam Empiricorum colluviem, qui jam illo tempore sine ulla ratione hoc remedio præstantissimo abusi, non paucos ægros vita exterminarunt. Quid autem hoc ad me, qui potius naturam, administrationem, summam necessitatem ac utilitatem Clysinatum indagare, prout fert ingenii modulus, instituo. Beat. *Mæbium* Disputatione singulari hoc præstitisse fama, non autopsia mihi innotuit, præter eum nemo in Disputatione (singuli autem ferè Authores sparsim) quantum novi, descripsit. Ego, tam *Veterum*, quàm *Modernorum* monita & observata de dictis præcipua colligere, breviter contrahere, in usum meum vertere, & quantum per ingenii vires licet, publico exponere examini constitui, limites tamen *Disputationis* non transgressurus. Supremus Archiater DEUS T. O. M. aspiret innocuis conatibus meis, ut nihil hoc loco proferam, nisi quod rationi & experientiæ consonum, futuræ Praxi Medicæ velificetur, & certissimam ægrorum salutem procuret.

§. I.

**C***lysma* Græciæ suos debere natales nullus negabit, siquidem à verbo κλύζειν, quod abluere, lavare significat, (unde Latinis Ablutio, Collutio, Lavamen, Lotorium, & Gallis in specie Lavement audit;) fluit Κλύσμα, Κλυσμός, Κλυσήρ, Κλυσήριον, quæ & ipsa nomina jam pridem Romana Civitate donata frequentius hinc inde occurrunt; imò ad ipsos Germanos promanarunt, qui hoc remedii genus appellant ein Clyster. A modo applicandi vocatur Enema ab ἐνίημι, immitto, infundo, injicio, hinc rectè nonnullis dicitur Infusio, Injectio. Accuratioꝛibus Enema liquorem immitendum, Clyster Instrumentum injectioni inserviens dicit. Ἐλασμα, rarum



verbum, fistulam immittendam, ut injectio liquoris fiat, non Clysterem ipsum dicit; vid. *Van der Linden Select. Med. Exerc. 4. numer. 101.* Ne quem autem *Homonymia* offendat, sciendum Clysteres non unum in Medicina sensum obtinuisse, latum scilicet, strictiorem, & strictissimum. Latè dicunt quasvis Injectiones factas in Cavitates corporis vel naturales, e. gr. in os, nares, aures, uterum, vesicam, unde ubique apud Practicos Clysteres Auriculares, Vesicales, Uterini, &c. leguntur: Vel p. n. nempe in abscessus, fistulas, aliaque sinuosa ulcera. Huc pertinet Clysmatica nova, Chirurgia alias Infusoria & Transfusoria dicta, hoc seculo inventa. In illa varii Liquores Medicamentosi in venam ægri apertam immittuntur, tum varia experiundi, tum sanitatis recuperandæ gratia; in hac verò sanguis ex uno Animali in aliud, imò in ipsum hominem à Nonnullis infunditur. Vid. post *Alios B. Ettmüll. de Chirurg. Infus.* Secundariò & minus propriè adhuc à multis, præsertim à vulgo accipitur Clyster pro ipso instrumento, cujus ope medicamentum in anum injicitur. Licet quidem utraque liquor & instrumentum, docente Celeberr. *Wedelio de Comp. Medic. p. 83.* ad unum perfectum constituendum actum requirantur, nec unum ab altero sejungi queat. Ego verò generalem hunc sensum, & omnes sub eo comprehensas species mitto, specialissimè & strictissimè sumtum Clysterem hic subintelligens, quem sequenti modo lubet describere.

## II.

Clyster est *medicamentum liquidum, quod beneficio instrumenti appropriati, per guttur inferius, pro vario medendi scopo, in Crassa Intestina injici solet.*

## III.

Communi Authorum Consensu, primus hujus remedii *Inventor* est Ibis, avis in Ægypto ciconiis nostris parum dissimilis, quæ referente *Plinio* lib. 8. c. 27. sentiens in Intestinis molestiam quandam, Nili aqua colli cutem repletam, mediante rostro, cujus aduncitatem in anum immittit, evacuat, hacque ratione intestina abluit, eluitque, & se à molestiis prius infestantibus liberat. Hæc quidem nunc in dubium non voco, sed id, an sola hæc avis, & non potius ipsa natura hoc remedii genus homini detexerit, constat enim toto die, quam ingeniosa sit illa in hominis salutem, non tantum varias variorum humorum instituere evacuationes, sed & ipsorum excrementorum non



uno modo peccantium in multis spontaneis alvi profluviiis tentare sæpe exclusionem. Ipsos etiam ægros vel ex impatientia, vel ex desperatione non rarò nova medicamentorum excogitasse genera observationes testantur, sic legere est in *Ephem. Cur. Ann. 1. Obs. 98. & Ann. 2. Decur. 2. Observ. 44.* de duobus ægris, quorum unus Baro cochleari quodam ligneo, alter Nobilis succula, *ein eisernen Spanner* in anum intrusa, à præsentissimo mortis periculo, quam ipsis Obstructio alvi pertinacior minata erat, se liberarunt.

#### IV.

Quicquid sit de Inventore hujus remedii, exinde tamen patescit, illud non nostri demùm seculi esse inventum, sed *Antiquissimis Medicis* jam usitatissimum fuisse, variis scriptorum monumentis suffragantibus. Refert *Plutarchus* in Euterpe, Clysteris usum apud *Ægyptios* tam fuisse frequentem, ut singulis mensibus triduo, sanitatis conservandæ gratia, purgarint se vomendo, atque intestina diluendo. *Herodoto* teste, Clysterum usus ipsis menstruus erat, *μεσφυλάξουσιν ἐν ἐκείνῳ*. Quos imitati *Græci & Arabes* non tantùm ad varia intestinorum symptomata, sed & multos alios corporis nostri morbos etiam acutissimos debellandos, Clysmata in usum vocarunt, adque illa velut ad sacram anchoram confugerunt. Neque tantùm in Epilepsia, Apoplexia, Paralyfi, Febribus, &c. Sed & in variis, quibus præcipuè peti solet sequior sexus, afflictionibus præscripserunt Enemata, teste *Hippocr. lib. de morb. mulier. Mesue lib. de agritud. matric. c. 8. seqq.* imò *Hippocrates in Epidem.* ubi longum Catalogum ægrotantium enumerat, Clysterum mentionem facit frequentem. Apud *Hispanos* Clysmatum usus adeo invaluit, ut nullum ferè malum sit, cui non, attestante *Mercato Op. Tom. 2. l. 1. c. 3. p. m. 59.* hoc medicamenti genus profuisse experti sint. *Galli* tantùm non abhorrent, ut la mode frequentiam ipsorum sæpius absque necessitate injungat. Ne jam de aliis dicam Nationibus, quibus hoc præsidium frequentissimum fuit. Si fortè excipias *Germanos* nostros, qui nescio quo fascinati errore, & falsa mentis persuasione, evacuandi rationem per Enemata abhorrent, ut sæpius nullis monitis, nullis precibus illa admittant, quin potius cane pejus & angue detestantes mortem præferre hujus generis curationi videantur. Alii teste *Rosin. Lentil. Ephem. Cur. Ann. 2. Dec. 2. Obs. 152.* Clysmata, non nisi cum jam de ægro conclamatum sit, præscribi existimant, *man nehme ihn*



ihn für einen todten Mann an / er sey so gut als hin / man gebe kein  
Heller mehr umb sein Leben. Imò sunt nonnulli, qui referente eo-  
dem, ante applicationem Testamentum condunt, exemplo eorum,  
qui aut Lithotomis aut Celotomis sese subjiciunt. Cum tamen hoc  
remedium omnium mitissimum & tutissimum sit, ut infra dicam.  
Sed de hac pertinaci meticulositate inter nos hîc multum hodie re-  
mittunt plerique. E Doctioribus quosdam Injectiones has detestari,  
easque apud ægros suos in odium adducere, jam tum in Præloquio  
mentionem feci, quorum Antesignanus est Joh. Baptist. *Hel-*  
*mont*, qui Lib. de febr. c. 7. & *Pleura furens* §. 28. 33. & 34. Clyste-  
res tanquam pudendum Medentum subsidium nunquam nisi cum  
pudore se præscripsisse scribit, non solum quod Intestinis naturaliter  
sint noxii, ad Ileon nunquam ascendant, sed & quod morbos  
non tollant, intestinis ignaviam inducant, & quæ alia ejus sunt ar-  
gumenta, ficulneo innixa fundamento, quæ recitasse est refutare,  
& post Homerum Iliadem, & post Roscium Comœdiam scriberem,  
si ad singula illa respondere animum applicarem, cum Solenander  
etiam indoctorum rationes S. 3. Conf. Med. 28. refutarit, ac Frid.  
Hoffmannus in Meth. Med. lib. 1. c. 10. Rolfinc. Meth. cogn. &  
cur. febr. c. 128. & Buschoff de Podagra & Moxa p. 2. c. 9. jam an-  
tea id executi sint. Illud saltem moneo, quod si Enemata ob pudo-  
rem deberent proscribi, caderet obstetricum officium, actum esset  
de Gravidis, aliisque fœminis periculose decumbentibus, siquidem  
eadem ratione Pessaria, Injectiones Uterinæ præter fas & conscien-  
tiam, quam utique Medicus pensi habere debet, proscriberentur;  
ne de aliis dicam Operationibus Chirurgicis Hernio-lithotomorum,  
aliisque medicamentis externis, quæ necessario partibus verendis  
sunt destinatæ. Abusum Clysterum, & exinde secutas noxas nul-  
lus probabit Medicus Dogmaticus. *Helmontius* simul & rationi,  
& experientiæ medicæ obloquitur, quæ causa etiam est, quare ab  
ipsis ferè juratis affeclis suis haud paucis deseritur, ex quorum nume-  
ro est Fr. Oswald. *Grembs Tr. Med. Theor. Pract.* L. 2. c. 1. §. 5. seqq.  
ubi contra suum Magistrum in variis corporis humani afflictionibus  
varia commendat Enemata. De *Paracelso Borrichius* Assertor Che-  
miæ Paracelsicæ scribit: Si verum fateri libet, nihil adeò à vero alie-  
num dixit, dum turpissimum medicamen vocavit, sed utilitas vincit tur-  
pitudinem. Etiam turpia delectant aliquando, quod de simiis certum.



*Angelus Sala*, qui initio & ipsemet acriter in Enemata fuerat investus, non dubitavit tandem non laudare tantum, sed & meliores eorum formulas tradere. Nec terreat infelix quandoque ex mala Clysmatum facta applicatione secutus eventus, cum Clysterem frigidum apud *Th. Barthol.* c. 1. *Hist. anat.* 76. calidissimum apud *Zacut. Lusit. Prax. admir.* L. 1. Obs. 142. ægros è vita sustulisse legimus. Aliis namque innocentissimis remediis ob malam & sinistrè adhibitam administrationem idem contigit fatum, sic post Scarificationem mortem narrat *Zac. Lusit.* l. 1. obs. 66. à Purgatione alium fato cessisse *Idem* observat. 68. testatur. Celeberrimus *Francus* de Clysteribus habet seqq. Cùm alterum jam haberet æger pedem in Cymba Charontis, quod dicitur, alterumque simul esset illaturus, Clyster demum olim adhiberi solebat, adeoque velut signum, imo per imperitiam vulgi judicantis sæpe ut causa lethality allegabatur. Hinc multi, qui vitam sibi longiorem, vel suis etiam, optabant, imaginatione mortis certò subsecutura, Clysterem plusquam *Vatiniano* prosequabantur odio. Innocentius tamen, minimèque nocivum remedium vix ac ne vix quidem invenitur ipso Enemate; adeoque & infantibus nuper natis, nedum adultioribus hominibus tutissimè applicatur quamplurimis in morbis, e. g. torminibus, convulsionibus, flatibus, intemperie biliosa, imo quavis; febribus, capitis, oculorum & thoracis affectibus; malo hypochondriaco, scorbuto, diarrhœa, dysenteria, colica maximè, iliaca, enterocèle, scirrhotestium, calculorenum & vesicæ, parturientibus, hydrope, &c. præter testimonia plurimorum Authorum, hæc quotidiana salutarisque confirmat experientia.

## V.

Vocavi Clyisma medicamentum liquidum, quò innotescat, sermonem hîc non esse de Clysteribus ex Fumo Tabaci conflatis, à Turcis primò inventis, quos postea imitati Angli singulares, neque à Barbarorum Fumiductibus valde discrepantes, excogitarunt machinas, quibus fumum illum in Intestina insufflarent, quarum delineationem, adhibitis iconibus, accuratè exhibuit *Joh. Andr. Stisserus* in peculiari Tractatu de *Machinis Fumiductoriis*, ubi scribit se novo hoc præsidii genere mira præstitisse, non tantum in sedandis ventris torminibus, sed & maximum auxilium adversus Hystericam Passionem, Epilepsiam, Apoplexiam, Hydropem, Dysenteriam, &c. ope istiusmodi Clysterum parasse. Contra Colicam itidem præsentissi-

mum



munum medicamentum ex Clysteribus ex fumo tabaci immixtis promittit Th. Barthol. Cent. 4. Epist. Med. 92. p. m. 523. Præter fumum tabaci, alia adhuc ex variis medicaminibus in fumum facile resolubilibus suffimenta in anum immixta, felicissimè in gravissimis & desperatis ferè affectibus in usum traxisse testatur *Author* modo laudatus. De horum autem Clysmatum usu viribusque agere, instituti mei ratio prohibet, cum potius in illorum Clysmorum indolem ac naturam, qui ex liquida componuntur materia, inquirere animus sit. Si quis autem *querat*: Quare fumus tabaci minori cum periculo in intestina infunditur, quàm decoctum ex foliis nicotianæ paratum? Cujus usum subito præcordiorum anxietates, lipothymia, sudores circa frontem frigidi, totius feralis quasi pallor, aliaque similia symptomata insecuta sunt, teste B. Ettmüll. de Præscript. Form. p. m. 184. Idem ferè, sed feliciori cum eventu expertus est *Celeberr. Waldschmid*, qui Clysterem ægro cuidam Epileptico ex decocto foliorum nicotianæ applicatum, tanta efficacia alvum & vomitum movisse, ut animam agere videretur, optimè tamen curam successisse, & Epilepsiæ paroxysmum discussum fuisse, refert in *Ephem. Ann.* 2. Dec. 2. Obs. 51. *Respondeo* 1. Haud rarò Clysteres, quos Decoctum Nicotianæ non ingreditur, per accidens talia inducunt symptomata, non tam sui, quàm dispositionis corporis, cui injiciuntur, culpa. 2. Haud exigua inter fumum & decoctum medicamenti est differentia.

## VI.

*Corpus* sive *Materia primi Ordinis*, ut in Pharmaceuticis loquuntur, Enematum est vel Liquor simplex, vel compositus, sive Decoctum vel Infusum ex variis ingredientibus paratum. Ille *Antiquissimis Medicis* solummodo notus erat, (utcunque *Arabibus* Clysteres Compositi etiam suo tempore innotuerint,) totumque Clysmatum corpus constituebat, pro vario medendi scopo, sicut & nobis hodieque varius. Inter Simplicia illa, quæ injiciuntur, sunt aqua simplex, marina, fontana; Hanc vehementer salitam, pro magno secreto, in alvo sollicitanda, venditat *Mynsicht*, nec unquam fallere asserit in suo *Armam. Chym.* Sect. 32. Irritum tamen ejus successum in Colica, acutissimaque alvi obturatione expertus est *Sam. Ledelius*, *Eph. Ann.* 3. Dec. 2. Obs. 100. aqua hordeacea, chalybeata sive ferrariorum, Acidulæ, Thermæ, aquæ destillatæ; Cerevisia; lixivium

B hydro-



hydromel; Olea varia, uti *Galenus* ipse ex sola infusione olei rutacei, cum acerbissimo dolore colico afflictus esset, convaluit. Ex solo oleo vel uno, vel quibusdam mixtis injectis Clyster in pertinaciori alvi obstructione, item contra scybala indurata prodest. Huc revoca Lac vaccinum, caprinum, ferratum, & in quo filices igniti aut alia aliquot vicibus fuerunt extincta, serum lactis; juscula, brodia; Vinum dulce, malvaticum, Hippocraticum, quo solo mulierem gravissima Colica vexatam curavit *Rondelet. lib. de Medic. Intern. p. m. 13.* generosum in Colica Scorbatica suadet *Wedelius*; imò acetum, quod in Ulceribus Intestinorum adhibuit *Mesue lib. de dol. Intest. c. 3.* Neque Urina propria aut pueri vinum bibentis omittenda est, præcipue in Hydrope, Ascite, Tympanitide, ex Observatione *Michælis, Willisi, Aliorumq;* ita in dictis casibus Urinam humanam pro Enematibus feliciter adhibuisse *Petrum à Castro* referunt *Ephem. Ann. 2. Obs. 158.* Siquidem salina & rigida Urinæ corpuscula tubulos, mæandrosque Intestinorum exiguos aperiendo, fibras intestinales vellicando, laticem serosum in abdomine fluctuantem versus inferiora proliciendo, ad Intestina reducendo, viam ad elabendum monstrant. Quid dicam de sanguine brutorum adhuc calente, quem in Dysenteria, immodico Hæmorrhoidum fluxu, injiciendum suadent *Platerus, Riverius, Wedelius*, omnemque fluxum sanguinis ex tali injectione mirabiliter compesci posse scribunt. Salsus etiam muriæ liquor, quem *Veteres* teste *Rondeletio l. c. p. m. 17.* in Coxendico dolore, & ulceribus intestinorum depascentibus injicere consueverunt. Clysteres ex solo Spiritu vini *Oswaldus* celebris Chemicus quondam in Colica Spasmodica, ad sal Ponticum, quod ipse mali causam accusavit, enervandum injiciendos suasit.

## VII.

Utcunque hæc Simplicia parabilis copiae sunt, & suo effectui non aspernabili gaudent, nostris tamen temporibus frequentiori in usu sunt Liquores Compositi, qui partim ex dictis Liquoribus componuntur; partim ex aqua cum furfuribus, piscibus, passulis, prunis, fumaria, sumach, aliisve variis decocta; ex brodiis castratorum gallorum, capitis, pedum Vervecis, Vituli, Intestinorum arietis; ex jure gallinarum, cicerum, oryzæ, mugilis piscis, vel saxatilium, vel ostreorum, & aliis, in quibus decoquuntur l. infunduntur Ingredientia varia, pro varia Medici intentione multis morbis, partibus-

que



que afflictis opponenda. Clysteres siquidem non tantum ad alvum emolliendam, expurgandam, flatus discutiendos, vermes occidendos, præscribuntur, sed eorum usus in sexaginta aliis affectibus, quamquam in remotissimis partibus hospitantibus, pro derivatione, diversione, revulsione, Spirituum sopitorum excitatione, &c. expetitur. Decoqui autem, aut aliquando, quod rarius fit, infundi pro parandis Liqueoribus Compositis ad Clysteres possunt ex Regno Animali varia, ex quorum censu sunt Extrema brutorum, Capita, Intestina, Omentata, Pedes agnorum, hædorum, arietum, vitulorum; C. C. (quo ejus gelatina melius extrahatur) sterco pavonis, columbinum, asininum, equinum, caninum, quæ duo posteriora *Willisus* commendat in Tympanitide. Reliquæ Animalium partes, medulla nempe, mel, butyrum, lac, &c. aut Liqueorem constituunt, aut Decocto adjiciuntur, inque illo dissolvuntur. Ex Regno Vegetabili quæ huc trahuntur, usitatissima solent esse, pro varia medica intentione, talis enim, ut dicam brevi post, multiplex per Clysmata executioni datur, Varia, quæ vel sola in liquo decoquuntur, vel illis adjiciuntur. Et hæc vel integra, vel una aut altera sui parte coctionem subeunt, uti folia, flores, fructus, semina, radices, cortices, ligna &c. quorum uberiores & accuratiores notitiam qui desiderat, adeat *Præcticos* medendi Magistros, & *Pharmaceuticos* Artifices. Ex Regno Minerali non multa subiectum & materiale Decocti constituere solent, plura etenim non nisi colato jam liquori demum adduntur. Inter quæ Quidam assumunt Crocum Metallorum, sed ille tutius decoquitur, atque non nisi, ubi acriori & fortiori stimulo opus est, e. gr. in Epilepsia, Apoplexia, Melancholia, Comate, & aliis soporosis affectibus, & quidem in exigua quantitate in usum duci debet. Huc accedunt cerussa, lapis hæmatites, terra sigillata, bolus armena, & alia Adstringentia, quæ *Antiqui Medici* simul liquori pro decoctione adjiciebant, licet rarius; crebrius n. illa Colaturæ demum affundebant, de quibus autem in seqq.

### VIII.

Liquori, de quo hætenus, siue simplici, siue ex simplicibus mixto, siue, post dictorum materialium Decoctionem aut Infusionem, ritè ad leges Pharmaceuticas factam, per pannum colato varia admisceri solent medicamenta, vel pro scopo medico augendo, vel ingrediens unum aut alterum corrigendi, demulcendi, mitigandi, irritandi, stimulandi, &c. intentione. Dicuntur Talia *Materia secundum*



di *tertii Ordinis*, & sunt variæ consistentiæ, l. Simplicia, l. Composita, itidem ex penu trium Regnorum deprompta. Prioris generis sunt Sal commune, marinum, Sal Gemmæ, quæ non solum alvum proritant, sed & Enematis exitum faciilitant; præter quod eadem ob particulas rodentes, mordicantes, in Dysenteria, aliisque intestinorum læsionibus, locum ægre inveniant. Nitrum Veteres pro Sale adjiciebant, rati hoc magis adstringere, illud verò plus abstergere. Vitelli ovorum ideo, quod lubricant, mitigant, asperitatem obtundunt, & intestina ab acrimonia defendunt, multis adduntur Clysteribus. Admifcentur etiam mel, saccharum album, rubrum, Thomæum alias dictum, illud ventrem magis laxare, magis abstergere, quàm album annotat *Zuvelferus Animadvers. in Pharmacop. August. pag. 76.* butyrum, pinguedines, axungia, sebum hircinum, sive cervinum, quod omnem abrasionem impedit, intestina oblnit, obducit, unde Lorica intestinorum nonnullis audit; recens autem sumatur, cum vetus teste *Osvv. Grembs. Tr. Med. Theor. Pr. L. 2. c. 1. §. 5.* acredinem contrahat, noxiumque sit; idque cum Vitello ovi, ne denuo congrumescat, inque coagulum abeat, subigatur; *Galenus lib. 12. Meth. Med. & Lib. 1. de simpl. facult. c. 36.* illud prius cum modico oleo rosato temperandum, & probè calefaciendum suadet. Sevi loco Candelam Vulgarem usurpari posse docet *Morellus Meth. præscr. form. l. 2. sect. 2. c. 14.* cum ejus litu excoriationem statim perfanari videamus. Adduntur etiam vinum, acetum, succi, ex quibus succum Cancrorum fluviatilium in Dysenteria, tam in jusculis, quàm Clysmatibus commendat *Laudatus Francus*, & quo vix contra Gangrænam intestinorum remedium aptius dari experientia didicit *Celeberr. Brunnerus*, in Eph. Ann. 6. Dec. 2. obs. 195. p. 392. ex Sapa sola Clysteres injectos Urinas atras reddidisse, ab interno tamen ejus usu nunquam tale quid sibi contigisse refert *Famigeratiss. Schröck.* in Eph. cit. obs. 8. p. 28. Balsami Peruviani vires in ulceribus, aliisque infimi ventris afflictionibus maximè evehunt *Præctici*; prodit *Laudatus Schröck* Eph. Ann. 3. obs. 76. se juvenem quendam atrocissimis ventris torminibus, nullis remediis etiam narcoticis cedentibus, afflictum Clystere, cui Balsam. Peruv. 3j. adjecta fuerat, brevi tempore pristina restituisse sanitati; eundem balsamum in ulceribus intestinorum extollit *Osvv. Grembs l. 4. lib. 2. c. 1.* Consule por-

rò, si



rò, si libet, de viribus balsami hujus *Aug. Thoner. Obs. Med. 12. lib.*  
 4. Prætereapiper, sinapi, macis, mastiche, camphora, cera nova; manna Calabrina, fel tauri, hirci, bovis ad occidendos vermes; muria piscium; Caseus vetus assatus, quem *Veteres* pro astringendo usurpabant. Terrea itidem & Gummosa, scil. bolus armena terra sigill. lemnia, lap. hæmatit. corallia, spodium, lythargyr. charta combusta, gummi arabicum, ammoniacum, & alia Adstringentia, quæ pulverisata *Antiqui* Colaturæ adjiciebant; quos autem meritò *Recentiores* reprehendunt, cum talia parietibus intestinorum se affigendo, adglutinando, membranas eorum exulceratas, & ob mucum abrasum valde sensiles magis offendant, dolorem augeant, aliaque periculosiora excitent symptomata; sic ex sagapeno, ammoniaco, & aliis similibus injectis subitò Nobilem quendam extinctum esse refert *Rondelet. de Med. Int. p. 13.* Sin oburgens quoddam & inevitabile Indicans talia præscribere Medicus cogitur, ad præceptum *Rondeletii, Weckeri*, aliorumque in mortario aut cote, ad normam Pictorum, ejusmodi Adstringentia probè contundantur, oleo permisceantur, & si qua crassamenta in fundo resederint, abjiciantur. Alii denique Pastillos ex arsenico, calce viva, auripigmento rubro, aliisque dissolvunt, teste *Fabric. Hildano de Dysent. c. 10.* sed hæc, quia caustica, erodentia, venenosa, summos cruciatus, convulsiones, imo mortem ipsam inducere notat idem *I. c.*, suadenda non sunt.

## IX.

Ex Compositis primùm se offerunt Salia fixa & volatilia, quæ Enematibus addita efficacissima esse in Suffocatione Hystrica, Epilepsia, &c. docet *B. Ettmiüll. Comment. ad Schröd. P. 2. p. m. 80.* Nitrum præparatum, Antimoniatum ad leniendum, abstergendum, Tartarus Vitriolatus, cremor Tartari, Antimoniū Vitrificatum, quod non solum minus noxium, quàm Elect. Diaphœnicon, verum etiam multò efficacius esse putat *Quercet. Pharm. Dogm. Rest. c. 18.* Crocum Metallorum adeo fortiter stimulare, ut vomitus post ejus injectionem consecuti sint, tradit *B. Ettmiüllerus.* Admiscentur saccharum rosatum, mel anthosatum, rutaceum, mercuriale, composita varia; oxymel; Butyra varia composita; sed omnium frequentissime Olea varia expressa, cocta & destillata, circa quæ monita vid. apud *Celeberr. Wedel. de Comp. Med. & Frid. Hoffmann.*



*Meth. Med.* l. 1. c. 10. Nec minus crebrò Clysmis addi solent confectiones, Electuaria alterantia, lenientia, purgantia; Mithridatium, Theriaca, quam in Hypercatharsi & Dysenteria Epidemica mirificè & subito prodesse scribit *Morellus* l. c. p. m. 314. Terebinthina Veneta, eaque vel sola, vel in Vitello ovi dissoluta, quam cum Enemate in anum injectam Urinam violaceo tingere odore jam *Antiqui* observarunt Authores; ejus a. particulas balsamicas non tantum intestina confortare, sed & in sanguinem raptas, cumque eo per totum corpus circulas, Urinam causamque morbificam stagnantem agitare, acetosam aut alio modo peccantem in meliorem crasin disponere docet *Willisus*. De Cassia ejusque Pulpa *notat Regn. de Graaf lib. de Clyst.* illam sæpe majori damno, quàm commodo Clysmatibus addi, cum in parva dosi admixta nihil operetur, in magna autem quantitate addita Clysterem pultaceum reddat, aliorumque remedium virtutem impediat; illa quoque (ut & Elect. Diacatholicum,) in Renum doloribus, ulceribus, flatuum proventu à nonnullis ex Clysteribus eliminatur, quia non solum flatus gignendo malum augere censent, sed & ardorem Urinæ ab ipsa reddi intensiorem observavit *Horst. lib. 2. Epist. med. sect. 14.* Huc referas Mucilagines psyllii, tragacanthi, &c. Unguenta, Linimenta, Emplastra, quæ prius in oleo, quò promptius ex instrumento in alvum infundi queant, probè sunt liquefacienda; Syrupos pro varia intentione varios, ex quibus Syr. Emeticum Ang. Salæ in convulsivis Paroxysmis loco Vomitoriorum, Clysteribus pro acriori stimulo addit *B. Ettmüll. Op. Theor. Pract. P. 2. p. 287.* Non excluduntur Pulveres, Pilulæ, Extracta, Trochisci de arsenico, de stella, de charta, de spodio, &c. quos Veteres in Corrosionibus & Ulceribus Intestinorum in alvum traxerunt: sed ad illos Cautelam supra §. 8. de Astringentibus notatam applicare licet. Neque è Galenicis Looch, Roob, è Chymicis Essentiæ, Elixiria, Spiritus, Tincturæ, Balsama hic exulare possunt. Nè tamen quis censeat, me ab illorum stare partibus, qui eò magis idoneum putant Clysterem, quò pluribus constat: nam quò simplicior, qui ex paucioribus constat, eò melior est.

X.

Ex dictis & dicendis constat, varias esse Clysterum *Differentias*: siquidem ratione Compositionis Clyst. alium esse Simplicem, alium Compositum jam dixi: Alius tam propter Ingredientia, quàm propter



propter Modum præparandi ex Pharmacopolio petendus est; Alius ex Medicamentis Domesticis & ubique obviis facile à mulierculis etiam parari potest. Emolliendi, alvum ciendi, dolores leniendi, aliaque intentione & frequenter & feliciter applicari suadet *Excellentissimus Dn. Præses, Præceptor atque Patronus meus æternum Colendus* Clysteres Domesticos, ex vel lacte, vel juscul. carniū, vel cremor. hordei & butyr. vitell. ov. mell. cum vel sine sale, optationi cum eventu, quàm si prolixis, ex Purgantium aut aliorum farragine coacervata concinnati injicerentur. Vocantur quidam Clysteres Specifici, ob medicamenta ingredientia, quæ censentur vulgò Specifica. Ab Effectu, quem præstant Clyst. & quidem vel respectu habito ad morbos, alius appellatur Antidysentericus, alius Anticolicus, alius Nephriticus, alius Hystericus, &c. Vel respectu ad usum alius est purgans, alius alterans; alius emolliens, adstringens, acris, demulcens, &c. alius carminativus, alius anthelminthicus, alius anodynus, alius traumaticus, & quæ aliæ ferè infinitæ sunt species, à facultate operandi desumptæ. Clyisma Polychrestum, quod multis satisfacit Indicationibus, plurimisq; in morbis, ex Lact. bubul. ℥j. terebinth. ven. in vitell. ov. dissol. ℥ss. mell. ros. ʒvj. commendat *B. Ettmüllerus* Dysentericis, Nephriticis, Hystericis, Scorbuticis. Quæstio inter Practicos occurrit vexatissima, de qua hîc breviter ob libertatem ordinis in tali Dissertatione: *Andentur Clysteres Nutrientes?* Affirmativam sententiam Quidam tam *Antiqui* quàm *Moderni* speciosis suffulciunt argumentis, ratiliquorem dulcem, blandum, alibilem per Enemata infusum, urgente necessitate, quando nimirum pueri, senes, ægri anginosi, utero suffocati, fame tabida emaciati, omnibusque viribus exhausti, vel ad omnem cibum assumendum sunt nauseabundi, vel fibris œsophagi resolutis, spasmodicè affectis, nullum alimentum deglutire possunt, vel deglutitum per vomitum omne rursus reddunt, talem, inquam, liquorem à famelico Ventriculo allici, inque Chylum converti, aut ab ipso Hepate statim ex intestinis per Venas Mesaraicas ejus quasi manus attrahi, inque sanguinem & nutritium concoqui succum. Quin ipsum quoque *χολώσεως* negotium Intestinis assignant, cum eorum & ventriculi eadem sit substantia, eadem continuïtas, idem color, eadem temperies; Observationes ex *Mesue* lib. de febr. c. 4. *Fabr. Hildano* in Cent. 4. Obs. 3. adducunt. Clysteres autem tales Nutrientes conficiebant ex vino, juscu-



jusculis, emulsionibus, gelatinis, vitellis ovorum, ex melle, saccharo, &c. inò ipsam Confectionem Alkermes hac intentione cum Clysterius infundere non veretur *Petrus Morellus* l. c. p. m. 314, Sed utique dubitare licet de hisce assertis utcunque *Clarissimorum Anthorum*, quia, ut taceamus de Ventriculi ac Hepatis vi attractiva à *Recentioribus* ubiq; explosa, hujusque Officina Sanguificatoria jam dudum quoque destructa, nemo certè comprehendere potest, quomodo ex liquore quodam licet blando in anum injecto, Chylus aptus ad sanguinis & nutrimenti elaborationem inter scybala elici possit; cum non imbuatur ventriculi Characterē illo, qui ad omnem chylicationem, & materiam sanguini ejusque particulis nutritioni aptis suppetendam est necessarius; partium itidem heterogenearū ab homogeneis nulla fiat idonea segregatio, ob bilis & succi pancreatici defectum, Clysmos enim ad tenuia Intestina naturaliter non ascendere infra patebit. Omnia tandem per inferius guttur injecta, si diutius quàm par est, (quod autem Patroni horum Clysmatum exigunt,) retineantur, putrida fiunt & cadaverosa; refert *Helmontius* lib. de feb. c. 7. se vidisse in fortioribus juscula cadaveris foetore horrentia rejecta, in tenerioribus verò deliquia movisse: Prætereo ipsum jam in Ventriculo elaboratum Chylum, ob dictorum humorum vitalium absentiam, non rarò, suffragante experientia, varia putredinis & corruptionis contrahere vitia. Non negamus quidem Chylum ultimam perfectionis suæ manum accipere in Intestinis; sed quod cibus per inferiora ingestus in verum ac laudabilem chylum, absque ventriculi opera transmutari queat, nullus unquam evincet. Absit tamen ut Clysmis omnem denegemus virtutem refocillandi, Spiritus languidos confortandi, vigorandi, cum indies videamus à variis odoramentis exterius saltem applicitis vires deficientes conservari, Spiritus delassatos, dispersos recolligi, recreari, quidni & penetrantes, subtiles ac spirituosæ Clysmatis ἀπορροιαὶ oscilla vasorum mesaraicorum tam sanguinem quàm lympham vehentium subirent, sanguini lege circulationis communicatæ Spiritibus suave solamen, refectionem gratam, activam subtilitatem conciliarent? vid. *Excell. Dn. Præsidiæ Diss. de Modo subit. resect.*

## XI.

Circa Præparationem & insequentem Applicationem occurrit *Quantitas* Liquoris pro Clystere infundendi, quam ægri vires, ætas, mor-



morborum diversitas, & retinendi intentio, & quæ sunt hujus notæ  
 plura, limitant atque determinant. Ordinariò quidem pro infan-  
 tibus ℥ij. usque ad ℥iv. præscribunt, nec ultra ascendunt Medici,  
 idque ob tenellam minusque capacem intestinorum structuram. Pue-  
 ris sufficiunt ad summum ℥vj. l. vij. Adultioribus infundunt ℥j.  
 progrediuntur usque ad ℥jss. ad ℥ji. Dn. *Præses* ultra ℥j.  
 non ascendit. Interim ab Ordinaria Quantitate non tantum de-  
 flectere cogitur Medicus in subjectis senilibus, languidis, modo  
 convalescentibus, in gravidis, & quibus intestina tenerioris sunt  
 texture; sed & sæpius pro Affectuum diversitate Dosin Clysmo-  
 rum immutare, minoremque solita præscribere Medicus prudens  
 tenetur, nam in colica, alvi stipticitate, flatuum copia, in dy-  
 senteria, lenteria, tenesmo, hernia, hydrope, in calculo & in-  
 flammatione Vesicæ, Renum, Uteri, inque variis Prægnantium  
 morbis, si insignis Quantitas immitteretur, graviora certè inde ægro-  
 tis accederent mala, ob nimiam intestinorum repletionem, Urete-  
 rum, Vesicæ, Renum, Uteri compressionem. Eadem Cautela at-  
 tendenda in Dyspnœa, Asthmate, ne à repletis intestinis Diaphragma  
 compressum pectoris augeat angustias. Idem dictum sit de Enema-  
 tibus, quæ diu intra corpus sunt detinenda, vel ob doloris mi-  
 tigationem, ulcerum consolidationem vel alia ex intentione, cum  
 alias justò citius illa effluerent. In similibus ergo casibus Dosin Clys-  
 matum sit ab ℥vj. usque ad ℥viii. ℥x. nec ultra dictos limites temerè  
 transgredi licet; aut Quantitate Ordinaria servata, successivè &  
 per vices Clyster injiciendus, ita ut si una medietas fuerit applicata,  
 post unam atque alteram horam pars residua infundatur. Quantitas  
 Ingredientium, & quidem Liquoris est ℥j. ad ℥ss. vel ℥viii. Miscen-  
 dorū ℥ij. ad ℥iiij. vel iv. In specie Electuar. & sim. ℥ij. ad ℥ij. Reliquo-  
 rum pro efficacia parum, à gutt. iij. gr. paucis, ℥ss. ℥j. ad ℥ss. Liquor.  
 in quo Decoctio fieri debet, ℥iiij. ad ℥iij. ℥ij. Residui à Coctione  
 ℥ss. ad viij. Decoquend. aut Infundend. à ℥j. ij. ad ℥j. In specie  
 pro Purgantibus Clysmis Purgantium dupla vel tripla dosis, qualis per  
 os assumi solet: Miscendorum & Dissolvendorum modo dicta est.  
 Quantitas *Evacuationis* à purgantibus in inferiori gradu in una, in  
 medio in 3. vel 4. in summo 5. aut 6. dejectionibus consistit.



## XII.

Quantitatem excipit *Qualitas*, circa quam graviter impingunt illi, qui Clysteres valdè Calidos infundunt, cum caloris excessus membranas intestinorum, fibrasque nerveas non possit non exurere, corrugare, aliasve periculosiores inferre molestias, teste experientia, mortem enim ex Clysmate calidissimo applicato subsecutam fuisse in §. 4. audivimus: præsertim verò Gravidis, & aliis, qui intestina habent sensu acutissimo prædita, Clysmi calentes valdè sunt infesti. Nec minorem committunt errorem, qui in febribus, & aliis morbis calidis actu Frigidos adplicant Clysteres, omnia siquidem frigida omnibus membranis nervisque sunt inimica, & ano, vesicæ juxta *Grüling. de tripl. evac. gen.* P. 2. p. 291. nocent, flatusque gignunt. Ex Enemate actu frigido Serenissimum Infantem, brevi post applicationem, convulsus obiisse meminit *Landat. Wedel. de Comp. Med.* p. 92. Ne dicam, Archeum in febribus ardentibus jam tum exorbitantem, ad præsentiam medicamenti cujusdam actu frigidi, magis ad iram concitari, sanguinis Orgasnum hinc augeri, &c. Clysmi tamen potentia frigidi, qui ex Medicamentis refrigerantibus & humectantibus sunt compositi, in dictis casibus non improbandi. Media igitur utpote tutissima incedendum via, & Clysteres non nisi moderatè calidi sive tepidi sunt injiciendi, calore tali, qualis est urinae modò emictæ, aut lactis modò mulcti, tali Vesicæ continentis liquorem injiciendum calore, qualis oculum clausum, manum exteriori non lædit: quò blando & paregorico ejusmodi fotu Intestina multis malis afflicta recreentur ac demulceantur. In Dysenteria teporem magis quàm calorem commendant.

## XIII.

Proximè nunc transeo ad *Instrumenta*. Ex omnibus usitatissima est nobis *Germanis* Vesica suilla affixa cannulæ in anum inferendæ, quæ ex ligno buxæ, vel ebore, vel cornu, vel metallo est confecta, multisque foraminulis perforata, in quam liquor Clysmatis immisus, mediante manuum compressione in Intestina effunditur; cujus usum olim quoque familiarem fuisse ex *Galeno* colligere est. *Gallis* & Quibusdam hodie *Germanis Gallizantibus* ferè sola Syringa, vel Siphon amplius & stanneus, vulgo eine *Sprünge* in usu est, quo mediante Liquorem longè altius latiusque in abdomen impelli, quàm communi nostro Instrumento, credunt. *Belgis* magis in usu est Instru-

men-



mentum *Gräffii*. Singula autem hæc cum vix citra pudorem, ob partium denudationem applicari possint, indeque ægri, sequior præsertim sexus, cui maximè natura verecundiam commendavit, à Clysteriis plus nimis abhorreant, imo ut mori interdum malint, quàm ea admittere, teste *Gabelkovero* l. c. qui sæpe expertus est multas mulieres interiisse, cum concedere nollent, ut Enemata ipsis injicerentur. Complures ideo *Practici*, quò inique diffamato huic remedio debita restituatur fama, novorum Instrumentorum Inventioni incubuerunt, quorum beneficio ægri sibi ipsimet infundere queant Clysmata; nec eos destituit fortuna, nam *Fabr. Hildanus* Lib. de dysent. c. 10. & Obs. Chir. 77. Cent. 1. non incommodum pro hac intentione delineat Instrumentum; aliud *Joh. Scultetus* describit in *Armam. Chir.* Tab. 13. fig. 5. & Tab. 42. fig. 8. non minus *Joh. Heurnius* Meth. ad Prax. lib. 1. tres depinxit similium Instrumentorum formas. Accuratus in his fuit *Regn. de Graaf*. qui l. c. p. 372. & seqq. Instrumentum à se inventum in figura ad vivum sistit, quo facillimè vel ab ægris ipsis, vel astantibus, absque ulla partium denudatione, extra lectum Enema applicari potest. Exactam illius delineationem quia pagellæ angustia renuit, meminerit Lector illud à Barbarorum & Anglorum Fumiductibus non multum differre, nisi quod funiculus ejus coriaceus cera, sevo & tinctura Umber dicta obducatur, quo liquor infusus per corii juncturas erumpere nequeat. Minimè hîc reticendus est Modus Clysteres adplicandi, quem *Joh. Paterf. Hain* in *Ephem. Ann. 3. Obs. 221.* communicat sequentibus verbis: *Indatur Vesicæ Clyster, & satis comtè ligetur, ita ut à Canna non dependeat Vesica. Indatur Canna in Intestinum rectum, & applicans super duro scamno insideat Clysteri, tùm pondere corporis premat Vesicam, ex qua lentissimè sine omni fastidio exprimat totum Enema. Nec ego nunc alio utor modo, & pudibundis meis agrotis, præsertim fœminis, res est gratissima.* Eundem ferè modum, sed de suo Instrumento, ægris commendat *Fabric. Hildan.* Cent. 1. Obs. 78. Monstravit mihi *Excell. Dn. Præses* Cannulam artificio singulari paratam, quæ si modo communi applicetur Vesicæ, quivis æger licet debilis, decumbens absque labore sibi ipsi immittere potest Clysterem.

#### XIV.

*Locum* pro his Injectionibus recipiendis in Definitione designavi *Intestina Crassa*, ut pateat, Clysteres non per os assumendos



esse, quod tamen non rarò à Rusticis, qui fortè sibi persuaferunt, ridiculum esse capiti laboranti via postica succurrere, factum esse, & quidem citra ullā noxam testatur *Wedel. l. c. p. 86. Controvertitur*, an Enemata ultra Crassa Intestina in Tenuia ascendere queant? quod experientia confirmare videtur, cum Clysmata ac Suppositoria etiam filo alligata, per os reddita esse multi ex Veteribus & Modernis referant Anatomici; idemque hodiernum contingere nullus dubito, quando scilicet Valvula à Bauhino reperta in principio Coli, & fine Cæci posita, p. n. distenditur, relaxatur, subsidet, vel rumpitur, vel peristalticè inversè movetur, vel alio modo læditur: sed quod corpus Clysmatis absque tali, sed rario-ri, vitii valvulæ casu, ultra Crassa transferri possit, nemini facile concedimus, siquidem Valvula dicta tam arctè, teste *Græfio lib. sæpius cit. p. 366.* claudit viam, ut si foliis intestina crassa in hominibus, porcis, &c. inflentur, nullus tamen ad tenuia pertingat flatus. Situs intestini Coli, qui versus hepar & ventriculi fundum tendit, non tamen Colon Valvula superius dicit. Subtiliora tamen Enematis effluvia altius intra corpus nostrum penetrare in superioribus probavimus; quod etiamnum ex Observationibus demonstrari potest, nam *Borellus* ex vino per Enema injecto Ebrietatem, & *Rhodium Cent. 1. obs. 38.* ex vino cum aromatibus in anum infuso ebriosum observavit delirium; ex Clysmate Terebinthinato Urinam violaceo imprægnari odore supra itidem memini. Et favent huic asserto Vixæ, quæ ejusmodi tenuibus evaporationibus aditum præbent, quas nonnulli cum *Sylvio* poros Coli & Recti constituunt; sed his multò patentiores sunt Venæ Mesaraicæ, duplici liquori vehendo destinatæ duplices copiosissimæ, suffragante *Willisio Pharm. Rat. P. 1. p. 19.* ad omnia intestina distributæ; quibus Vasa utut pauciora annumeres Lactea.

XV.

*Preparandi modus* ex generalibus Pharmaceuticis, circa Liquida per Mixtionem solam, per Decoctionem cum immiscendis & dissolvendis variis paranda, Regulis, per diversa indicata determinandis passim traditur. De modo Applicandi undique noto impræsentiarum parcus sum, neque aliud addo, nisi quod fistula ano intrudenda quodam pingui sit inungenda, quò scil. facilius & sine molestia inferi queat; ut & bombyce circumducenda in fine, ad præcavendum omnem Clysterii refluxum; nec minus cavendum, ne una cum  
Clys-



Clysmate copiosus intrò irrumpat aër. Quem Situm verò æger in ipso Applicationis actu capere debeat, non conveniunt inter se *Authores*. *Antiqui* ægro, pedibus elevatis, & capite ad genua declinato, Enemata infundebant, & quidem decumbenti vel supra dorsum in passionibus renum, vel supra ventrem in ventriculi affectibus, vel in eo latere, ubi doloris sensus major, notante *Mesue* lib. de ægrit. intest. c. 1. *Ægineta* lib. 6. c. 78. *Fernelius*, *Hildanus* & alii dextrum commendant latus, in sinistro enim decubitu Clysmum in intestino recto aut colo, quod tota reliquorum mole comprimitur, subsistere, ita ut ulterius progredi nequeat, credunt. E contra sunt, qui sinistrum eligunt latus, rati facilius & altius Clysma per Intest. rectum sub ventriculo excurrere posse. Sed parum refert, quinam corporis eligatur situs; Supinus præ reliquis commodior esse videtur, præsertim infantibus, & iis, quibus ille fuit consuetus, tunc enim nulla Clysteris ascensio, ejusve subsistentia, vel intestinorum compressio est metuenda. Potest quidem æger modò in dextrum, modò in sinistrum se devolvere latus, quò Clysmus omnes coli alluat parietes, (unde *Mesue* l. alleg. ventrem manibus fricare ac movere jubet,) & postmodum in eo quiescere loco, ubi maximum percipit doloris sensum. Non contemnenda exceptio *Leonh. Fuchsi*, quando ille *Meth. Med.* lib. 3. c. 44. in ulceribus, aliisque vesicæ afflictionibus, ægrum in genua primum reclinare, atque ita Clysma injici jubet, quò scil. intest. rectum à compressione vesicæ incumbientis liberetur, & ita Enema facilius infundatur. *Heurnius* lib. 1. *Meth. Med. ad Prax.* ægrum ore hiantem, ut muscoli abdominis relaxentur, decumbere suadet. Sensim autem ab initio, nec cum impetu Enemata sunt applicanda. Non rarò contingit, ut Clyster injici non possit, sed & vi adactus liquor mox effluat imò profiliat, nonnunquam nec ex vesica vel siphone propelli possit, cujus causam communiter in flatus hospitantes in intestinis & repellentes rejiciunt: Verum potior & frequentior causa est intestini recti, vel proximi coli contractio spasmodica, hinc prius mitiganda. Flatus aliquando ipsi vesicæ sive siphoni se insinuant, quo in casu extrahenda fistula, ut pateat exitus. Cum flatus à compressione vel simili causa detinentur, extrahi possunt, præsertim commodo situ ægri observato, siphone vacuo. Casum alium proponit *Hippocrates* lib. 3. de morbis, inquiens: *Et in quo resiccatur Intestin. & constipatur ex inflammatione, ita ut neq. flatum,*



neque alimenta transmittat, sed venter durus sit, & vomat interdum, neque purgantibus, neque venesectione, neque balneis, neque glandibus & Clysteribus officium facientibus, follem fabrillem. Et: Sin minus, folle fabrili indito, in ventrem flatus immittendus, ut tùm ventrem, tùm intestinum contractum distendas, deinde extracto folle, infusum per Clysterem injiciendum. Mentem Hippocratis, additis cautionibus necessariis exponit Trallianus l. 10. c. 1. Hodie tale remedium inolevit; nec an cum commodo ægri adhibeatur, hodierna comprobavit Experientia; si juvat, potissimum eo, quo suppositoria, juvat modo; Alia est extractatio flatuum, alia per tales immisos distensio. Post factam applicationem anus fortiori spiratione non commoveatur, sed manus vel ægri vel adstantis opera comprimatur, musculusque sphincter, quantum possibile, constringatur, ad Clyisma injectum detinendum; In Catalepsi pannum podici, ne Clyster effluat, appressit Platerus. Quietus dein æger jaceat, & omnes absint vehementes musculorum abdominis motiones, multa loquela, obambulationes, jectigationes, &c.

## XVI.

Ratione *Temporis* tria sunt adnotanda, quando nimirum Clysmata sint infundenda; quamdiu intra corpus detinenda, & denique quantisper eorum usus continuandus? De singulis pauca. Quoad primum, Medicus tam accuratè ad temporis electionem respicere non tenetur, præsertim urgente necessitatis casu, cui nulla lex, nulli positi sunt limites, ubi perinde in principio, augmento, statu atque declinatione morborum, in quavis anni parte, de die & nocte, qualibet etiam hora Clysterum potest fieri Injectio. Si verò nullum nos urget necessitatis telum, tutius erit, ut communem *Authorum* sequamur ductum, qui non ante duas vel tres horas post cibum assumptum applicari curant Clysteria, ne scil. coctio turbetur, ne cibus crudus & nondum elaboratus à Ventriculo ad Intestina protrudatur; Ita eodem servato temporis ordine ante pastum Clysmata infundi volunt, ne itidem Ventriculi coctio sive Chylosis interturbetur atque impediatur, juxta Veteres autem Chylus crudus ad inferiora trahatur. D. Fabre apud Parisienses Practicum famigeratissimum in febribus post paroxysmum, felici successu ægris Ene-mata applicuisse, (quò excrementitii humores tempore paroxyni in Intestina ablegati evacuarentur) refert *Regn. de Graaf.* lib de Clyst.



p. 368. Detinendi tempus diversum est, pro Clysmorum diversitate varians; in generetamdiu sunt retinendi, usque dum usui satisfecerint, nec primo egerendi pruritui statim obediat æger. Retentionis mora minima debet esse horæ quadrans, media, horæ medietas, hora 1. summa hor. 2. Purgantium. Aliorum largior conceditur mora. Detergentes autem, Abluentes, & hujusmodi ultra horæ dimidium juxta *Weckerum & Mercatum*, in corpore non cohibeantur; Anodynæ verò & Paregorici longiori tempore detineri debent; omnium autem longissimè illi, quibus glutinandi & consolidandi vis inest; secus qui purgandi intentione injiciuntur. In Dyspnœa vel alia Respirationis difficultate, in renum affectibus diu quoque Enemata non sunt detinenda, nec ægri ad illa sufflaminanda sunt cogendi. Quod si diutius, quam par est, Clyisma in corpore moratur & post horas duas aut tres non egeritur, idque vel ob doseos exiguitatem, vel ob sensum Archei in Intestinis nimis obtusum, fibrarumque circularium & oblique descendentium relaxationem, vel ob aliam etiam causam, æger nunc obambulando, nunc anum deprimendo ipse tentet exclusionem; & si neque hoc pacto promanat Enema, ex sola aqua & sale, aut aliud sale magis acuaturn repetatur, aut Suppositorium intrudatur, ad crassum Intestinum irritandum & stimulandum. *Gabelkoverus* unum Cyathum Urinæ bibere jubet, quem certò reliqua Clysteria secum educere scribit Cent. 1. Obs. 62. p. m. 110. Mihi videtur, dari faciliores gratiores modos. Clysteris operationem ejusque exitum, porrò Cataplasma ex speciebus Enematis residuis ad justam consistentiam coctis, abdomini impositum, optimè promoveri docent *Prædici*. Quando verò mox ab applicatione Clyisma rursus effluit, quod Apoplecticis & Paralyticis, ob musculi sphincteris resolutionem, non rarò contingit, *Mynsicht & Grülingius* aliud infundere, & hoc iterum elabente, ad tertium confugere jubent; verum in dictis casibus, salva eorum Authoritate, tutius est omisisse, quàm iteratò tentasse. Clysteres supra laudati Domestici si retinentur per integrum diem, absque tamen inflationibus, aut alia noxa, expellendi non sunt. De Durationis tempore, quamdiu scil. Enemata sint administranda, quærenti brevibus respondemus, ab iis desistendum non esse, quoad Indicans necessarium adest, hoc autem absente, absit etiam Clysterum usus. In nimis ventris doloribus quibusvis octo,



octo, sex horis Anodynos domesticos injicere licet. Sedulò tamen caveat Medicus, ne nimia Clysterum frequentia alvus officio suo fungi impotens reddatur, & subinde sollicitanda veniat, quod duobus Polonis contigisse testatur *Patersf. Hain* Eph. Ann. 3. obs. 221. quorum alter ab anno vitæ 40. ad annum 72. bis vel ter singulis diebus usus est Clysteriis: alteri itidem per annos 21. in usu fuerunt Clysteres quotidiani.

### XVII.

Clysmatum *Usus* tantus est, ut suffragantibus *Rondeletio, Henr-  
nio, Paræo, Dorncreilio, Morello, Gräffio, &c.* nulla sit corporis pars, quæ ex ritè administrato Clystere, non aliquam sentiat utilitatem. Tanti à *Curios. Rosin. Lentilio* Clysteria æstimantur, ut in *Ephem. Ann. 2. Dec. 2. obs. 152.* asserere non dubitet, se quando Clysteres Interdicto publico Medicina exulare juberentur, nolle esse Medicum. Juxta *Mercatum & Celsum* omnibus seculis nihil inventum est mitius, nihil benignius, nihil utilius, si alvus parum suo officio respondet, quàm Clyster sapienter accommodatus. Nec ulla est, adstipulante *Wedelio*, subjectorum dispositio, ullus corporis habitus, ullus sexus, nec ulla ætas, quæ Clysteriorum applicationem non recipiat, adeò ut ne Infantibus quidem recens natis parcendum sit; sic ille Infantem octo dierum, de quo jam ferè conclamatum erat, solo hoc præsidii genere felicissimè se restituisse prodit *de Comp. Med. p. 90.* Infantis nondum integrum diem lucem adspicientis ejulatus Clysmate ex Lactis ℥℥. & ol. chamom. ℥ij. sustulit *Excell. Dn. Præses*; In ipsis senibus jam decrepitis, & aliis debilissimis naturis, Clysmaticam Injectionem, modo nullum adsit contra indicans, tutò adhiberi posse minimè dubitamus, siquidem eorum debite paratorum operatio tam mitis ac blanda est, ut absque ulla perturbatione & tumultu alvum subducant, vires non dejiciant, sed potius Præsidem nervosi generis demulceant, solentur, roborent. *Qui Clysteres tanquam grave & admodum periculosum remedium rejiciunt, toto cælo aberrant, cum sint remedium benignissimum & innocentissimum:* Verba sunt: *Jacob. Primerosii* lib. 4. de vulg. err. cap. 20. Est Clyisma formula, quæ omnis generis medicamenti potest adaptari, pro diversissima intentione, in quam cogi possunt Liquida, Media & Sicca. Hinc pro ingredientium conditione Clysmata parantur, quæ acrimoniam mitigant, adstringunt, aperiunt, calefaciunt, urinam promovent,

ner-



nervos solantur, emolliunt, exsiccant, consolidant, glutinant, abstergunt, abluunt, humectant, hysterica sunt, menses movent; anodyna, paregorica, narcotica sunt, purgant, carminantia sunt, stimulant, refrigerant, sanguinem sistunt, vermes necant, educunt, vulneraria sunt, partium singularum affectibus uno vel altero modo subveniunt. Et hoc præsidium si ullis, certè delicatulis, qui ad quodvis medicamen per os assumendum nauseabundum habent stomachum, non potest non esse acceptissimum, quia nullum evacuans, teste sæpius laudat. *Wedel.* l. c. p. 82. certius alvum absque ulla nausea ducit, mitiusque naturam sollicitat, quàm Clysteres. Non pauci ex Practicis Enemata omnibus ferè Purgantibus utiliter præmitti posse, imo debere (unde in quibusdam casibus regulariter curationem a Clysmis incipiendam imperant,) censent, quò expeditius & felicius, sine ullo molestiæ sensu, viisita præparatis, succedat Purgatio; nam si cathartica nullis prius infusis Clysteriis exhiberentur, maximè ubi contumacior alvi adest constipatio, excrementitii humores ex Massa Sanguinea in intestina deturbati, ibique ob viam præclusam morantes, non leves tantùm cruciatus in iis facilè producere possent, verùm etiam in sanguinis alveum remeantes Cephalalgiam, Scotomiam, Syncopem, & alia gravissima excitarent symptomata. Consul. *Morell.* Method. præscr. form. p. 317. Non tamen semper præviis Clysmis opus est. Interdum alvi oppilatio tanta est, ut nullis cedat pharmacis, & non nisi Emollientibus per inferiora immittendis veniat referenda; ita *Rislandus* alvum per tres septimanas pertinacissimè obstructam, omnibus aliis irritis, solo olco olivarum singulis horis injecto, feliciter reclusit, referente *Ettmüll.* Op. Th. Pr. P. i. p. 73. Sic ex *Fernelio Crato* Consil. Med. lib. 3. p. 22. Legatum quendam Caroli V. ex injecto Clystere, durum quidpiam ad pedis longitudinem excrevisse, præmissis toto sexennio remediis mollientibus, tanquam si scirrhus in abdomine esset, repetitis autem Clysmatibus restitutum fuisse. Inter rariora est, cum materia reliquis sæcibus omnem exitum deneigans, solidissimè compacta nullis Clysteribus obedit, & alia illud it alioquin appropriata medicamenta, cujus exemplum legimus in *Miscell. Germ. An.* i. Obs. 98. de Barone quodam, tanta alvi stipticitate laborante, ut post pharmaca omnia fortissima frustra exhibita nil nisi certissima mors instaret, nisi ligneo cochleari majusculo, acuminato & inverso in anum fortiter intruso, & hinc inde agitato, materiam quandam spithamæ longitudine excrevisset, eamque adeo



compactam & tenaciter cohærentem, ut nec acuta securi in particulas dividi potuerit; Quo modoeducta materia æger è faucibus mortis ereptus est. Ubi à spasmodica intestinorum contractione alvus sicca est, mirum quantum præ Purgantibus in tali casu plerumque nocere solentibus, conducunt Clysmata, tensionem eorum p. n. tollendo, acrimoniam humorum demulcendo, oblinendo, infringendo &c. Vid. Excell. Dn. D. Zelleri, Patroni & Præceptoris mei Colendissimi *Disp. de Spasm. Intest.* p. 13. seq. nam Purgantia per superius guttur assumpta, acres lancinantesque particulas acuendo, via ob contractionem Intestinorum denegata, morbum magis magisque intenderent. Præter dictam alvi obturationem, omnibus etiam reliquis Intestinorum vitiis primario opitulatur Enemata. Ita in Cholera, Lienteria, Diarrhœa, Dysenteria, Tenesmo, jam olim *Veteres* commendarunt Clysmata, & hodiernum à *Recentioribus* illa in recensitis Affectibus magnopere extolluntur; nec in Fluxu Hepatico excludit *Excellentissimus D. D. Metzgerus beata memoria, Patronus & Præceptor meus etiam post mortem suspiciendus*, in *Disp. de Flux. Hepat.* In Hæmorrhoidum suppressione, earumque nimio fluxu ab aliis Clysteria quoque laudantur. Hypercatharsin cum Vomitu conjunctam solis Enematibus brevi temporis spatio feliciter sedavit *Ræsternus* in *Eph. Ann.* 3. Obs. 303. Quid dicam desævissimis ventris torminibus, à flatibus, variè acribus particulis fluidis, ulceribus, spasmodica Intestinorum stricture, materia vellicante, vel ab aliis causis, abortis; in quibus quantum Clysteres emollientes, mitigantes, anodynii, refrigerantes, carminativi, abstergentes &c. præstent, vix dici potest. Præter experientiam, quæ hic imprimis favet, plurimorum allegare possemus Authoritatem. Hinc Quosdam Clysterum in Colica non Patronos non de omni, sed de rariori specie intelligendos censeo: Ne de insignibus tot vicibus Colicis exhibitis commodis ex suasu & Consilio Dn. *Præsidis* à Clysteribus, sed non purgantibus, non vehementioribus stimulantibus, hîc quid dicam. Iliacum dolorem cum vomitu, crebraque lipothymia conjunctum ex Hernia oriundum Clysmate pacavit *Dan. Wincklerus* in *Eph. Ann.* 6. & 7. Obs. 44. atrocissimos alios cruciatus ab Hernia productos Clysmis compe-scuit *Joh. Schmid* in *Ephem. cit.* Obs. 93. Non enim solum tuto sed & prospero cum successu Clysteres in Hernia applicantur, ut merito *Wedelius* *Disp. de Hern.* miretur, hoc remedium tanquam minus tutum in hoc affectu à nonnullis rejici. *Evolv. Hildan.* Cent. 6. Obs. 73. Vermes, qui raro absque incommodo in Intestinis nidulan-



tur, à Clysteriis prolestantur, occiduntur, expelluntur. Calculos non rarò in gyrosis Intestinorum anfractibus hospitantes, per Clysmata infusa subduci, & cum insigni ægrorum levamine eliminari loquuntur Historiæ. Vid. Ephem. Ann. 2. Obs. 89. Mulierem quandam, post injectum Clysterem, squamas & spinas piscium, semen hyoscyami, particulas lignorum ac ramenta lapidum, portionem de pelle ovina vellere adhuc vestitam, maximo cum cruciatu dejecisse, oculatus est testis *Horst.* lib. 1. Part. 2. de morb. mulier. Obs. 13. In inflammatione, rimis seu scissuris, procidentia, paralyfi ani, suos itidem laudabiles præstant effectus Enemata. Magna autem cautione, ut injici possint, opus est; nam plerumque Clysterum applicationem hæc prohibent, sicut & Hæmorrhoides cæcæ, valde dolorificæ, facile & copiosè fluentes, ani ficus. Juvant autem, in quantum scybala duriora emolliendo, anum segnem laceffendo, intestina ab iis liberant; Humores fluxiles incrassando, cogendo: Vasa nimis aperta occludendo, dilatata comprimendo, fluxum p. n. compescunt; asperas, aculeatas, cuspidatas humorum particulas temperando, mitigando, eluendo obtundunt, inflectunt, exterminant; materiam viscidam, compactam incidunt, dissecant; flatus discutunt, partes strictas laxant, sordidas detergunt, mundificant, exulceratas, vulneratas obducunt, oblinunt, incrustant, consolidant.

### XVIII.

Nè dicas Fistulis tantummodo Intestinalibus destinatos esse Clysmos, cum etiam eorum vires in reliquas corporis nostri partes, vel ob viciniam, vel communionem vasorum, nervorum, tunicarum, &c. vel alium ob symbolicum quendam consensum, vel alio modo afflictas, longius latiusque se diffundunt, quam ut verbis exprimi possit. Audi ad hæc *Galenum*, qui lib. 1. aph. comm. 2. per Clysteria fieri particulares Vacuationes, non quidem solum ab ipsis intestinis, verum & à remotissimis etiam partibus, dicit. Si propinquiora intestinis loca, Vesicam, Ureteres, Renes accedamus, deprehendemus in eorum Affectibus, in inflammatione, calculo, nephritidie, stranguria, dysuria, &c. felicissimo cum eventu sæpius Clysmata præscribi; In Ischuria ex Ureteribus obstructis Clysterem præsentissimo cum fructu applicuit *Georg. Segerus* Ephem. Ann. 2. Obs. 23. Tubulis enim & meatibus emollitis, laxatis, reaseratis, calculis ac arenulis facillimam elabendi præbent viam; blando tepore paregoricam vim Renibus ac Vesicæ impertiunt, tensionem & convulsivum quasi Ureterum motum corrigunt, demulcent; Archeum nervosque



mirè refocillant. Ob Uteri viciniam, sequiori sexui maximum ex Clysteriorum administratione accedit solamen atque commodum, in variis, quibus imbecillior sexus obnoxius est, afflictionibus, e. gr. in mensium, lochiorum suppressione, & eorundem p. n. fluxu; in ulceribus, apostemate, hydrope, procidentia Uteri; in abortu præcavendo, difficili partu, doloribus post partum; ipsam quoque contra Sterilitatem *Veteres Arabes* commendarunt Enemata. De hac Clysterum actione in partes Intestinis vicinas differit *B. I. Dan. Horstius* Obs. 10. Per injectionem astringentis cujusdam decocti, plerisque sterilibus fœcunditatem se restituisse scribit *Celeberr. Volcamerus* in Eph. Ann. 2. Obs. 223. Gravidis adeò, urgente necessitate, non denegat Clysteres *supra laudatus Dn. D. Metzgerus* *pia memoria*, in *Disfert. de alv. constip.* Sed adhienda circumspèctio prudens. Puerperas Clysmorum beneficio à multis & magnis molestiis fuisse liberatas, quibus aliàs post partum laborarunt, nec tantum iis, verum etiam, quibus oppressæ fuerant non solum ante partum, sed & priusquam utero gererent, & nullis antea remediis cedere voluerunt, observavit & descripsit *Gabelcov.* Cent. 3. Obs. Med. 115. Quippe Clysteres præter dictas operandi virtutes conducunt hîc humectando, exsiccando, calefaciendo, stimulando, aperiendo, discutiendo, demulcendo; partes laxas stringendo, corrugatas laxando, debiles roborando; Obstructionem referando, nimium humorum fluxum sedando; lympham vitiosam ex oscillis vasorum exprimendo, emungendo, elutriando, &c. Nec minus efficax auxilium pollicentur Clysmata in ventriculi, mesenterii, hepatis, lienis inflammationibus, obstructionibus, scirrhis; in singultu, vomitu, aliisve variis partium dictarum vitiis; ita Vomitus mensium, urinæ per os claræ, auræ, sedimenti lenti, copiosi effusionem ad consuetas naturæ vias Clysteribus sæpe se revocasse autor est *Horstius* lib. c. Obs. 41. Hypochondriacos quantum juvent, quivis dies loquitur, imo desperatos tales solo Enematum usu se in integrum restituisse tradit *Hercul. Sax.* Porro quia Clysteres primarum viarum lubricatione, ablutione, depuratione, noxiorum humorum eliminatione fomitem multis morbis subtrahunt, Intemperiem Viscerum variam mitigant, corriguntque; nervosas partes firmant, spiritus demulcent, recreant solantur, &c. in febribus intermittentibus, continuis, malignis; in phrenitide, morbillis, variolis, (in quibus lubricantes saltem nec frequentes suadet *Dn. Præses*,) &c. Clysmis laudem tribuunt. *Sydenham* in febribus ad effervescentiam compescendam Enemata frequentia injici curat. Nè tamen laxior



fiat alvus, quia in malignis noxia, cavendum. Quartanam pene con-  
 clamatam in Vetula solo Clysmate, cui præter alia ingredientia, Tin-  
 cturæ suæ Vitrioli balsamicæ admiscuit *z*ij. citra omnem expecta-  
 tionem se sustulisse commemorat *Langius in Miscell. curios. med. c. 11.*  
*p. 30.* Variolas diu latitantes solo Enemate, omnibus prius sed in-  
 cassum tentatis, derepentè expulit *Carol. Raygerus, in Eph. N. C. Ann.*  
*4. & 5. Obs. 7.* quanquam in his affectibus tutius omittuntur Cly-  
 steres, præsertim si natura evacuationem criticam per alias vias insti-  
 tuere nititur, aut si excretio cutanea imminet vel expectatur. Vid.  
*Ettmüll. Op. Th. Pr. P. 1. p. 266.* unde in febribus Puerperarum acu-  
 tis, cum excretionibus cutaneis, Clysmorum administrationem pe-  
 riculosam fuisse perhibet *Idem l. alleg. P. 3. p. 55.* in Peripnevmonia  
 ac Pleuritide singulis diebus infundi jubet Enemata *Willisus.* In Tabæ,  
 Arthritide, Ictero, Podagra, Paralyfi, Rhachitide, aliisque, morbis qui al-  
 vum postulant laxam, Injectiones per alvum cum insigni levamine ce-  
 lebrantur, imò ausim dicere, in omnibus affectibus, ubi alvus pigrior  
 est, Clysmata cum fructu injici posse, modò vitium illud non sit à na-  
 tura & individuali quadam Idiosyncrasia, quo casu alvum citari non  
 vult *Dn. Præses in Posit. Miscell.* In Hydrope, Tympanitide quid Cly-  
 steria juvent, ex superioribus satis elucescit. Imò, cum Clysmata è  
 purgantibus parata sæpe suas particulas & vires ultra Intestina per  
 massam sanguineam toti transmittant corpori, ex hujus hinc singulis  
 regionibus aliquando educant heterogenea, contra plurimos morbos  
 ea feliciter injici patet.

## XIX.

Omnium maximè Clysmatum Virtus Revulsoria, vulgò dicta, ri-  
 manda mirandaque venit, quam ope evacuationis, & non rarò acrium  
 corpusculorū, quibus armata sunt, exsequuntur, quæ sive primas vias  
 ab heterogeneis & impedimentis liberando, sive fibras intestinales ir-  
 ritando, spiritus avocando, in ordinem redigendo, varia fluida p. n. alia  
 à nobilioribus partibus avertendo, deturbando, illuc ruitura aliò du-  
 cendo, ne in superiora irruant, præcavendo multum profunt, & viam  
 reliquis auxiliis sternunt. Nempe in Catarrho in genere, & præpri-  
 mis Suffocativo, Dyspnœa, Angina, Asthmate, Tussi, Vomitu  
 cruento, Sputo sanguinis, Lue Qrea, Palpitatione cordis, Dolore  
 Ischiadico, Melancholia, Mania, Epilepsia, aliisque Convulsivis Pa-  
 roxyfmis, Vertigine, Apoplexia, doloribus Capitis, in quibus  
 sæpe utramque facere paginam, & apud Exteros Cephalalgiam à cra-



pula solo Clysmate curari tradit *Bruno in Disp. de Ceph.* Spiritus in parte aliqua detentos avocant, à compedibus suis liberant, sopitos excitant in Passione Hyfterica, Apoplexia, Catoche, Lethargo, Caro, & aliis soporiferis affectibus. Avertunt à Capite toto, sic *B. Michaëlem* famulum cujusdam mercatoris Hydrocephalo laborantem Clysmatibus sanasse recenset *Ettmüll.* l. c. P. 2. p. 241. Ab oculis, naribus, unde Clysteres proficui sunt in Ophthalmia, suffusione, nyctalopia, phlyctænis, ulceribus, aliisque oculorum malis. Cæcitatem subitanæam post usum Clysmi carminativi citò sustulit *Hellvig.* obs. Phys. Med. 23. sic *Rondeletius* Meth. cur. morb. c. 58. p. m. 142. puellæ repenti ex cæcata ex sola Clysmatica Injectione mox visum restituit. In Ozæna, Polypo, Hæmorrhagia narium Enemata quando & quomodo juvènt, docet *Dn. Præses in Collegio Privato.* Ad inflammationem, dolorem, & alios aurium affectus quoque nostræ commendantur Infusiones. Veteres pro dictis scopis Clysteria adhibuisse non erant contenti, quin etiam ad venenum evacuandum illa, præsertim acria, quibus hoc peculiare esse judicat *Mercatus* Op. Tom. 2. lib. 1. p. 63. præscriberent. Præterea ad appetitum ex nimia ciborum repletionem, & excrementorum retentione prostratum revocandum opem Clysmorum in usum duxerunt. Adhæc Clysteres acres singulare quid præstant, quando nimirum illi Hirudines Hæmorrhoidibus destinatas, anum per Infortunium ingressas revocant, occidunt, expellunt. vid. *B. D. D. Metzger.* Syllog. 4. de Hirud. §. 13. Notatu haud indignum est, quod *Simon Schultz.* in Ephem. Ann. 3. obs. 152. sequentibus delineat verbis: *Novi puerum novennem, cui cum ante aliquot annos febre tertiana laboranti, & obstructions alvinas patienti, à me Enema ordinatum esset, audito solo Enematis (cujus applicationem valde metuebat) nomine, sponte alvus soluta est, illeque ab obstructionibus liberatus fuit, quod quidem bis vel ter evenisse recorder.* Contingunt talia haud rarò. Varias variis affectibus opponendas *Formulas* hic addere supersedeo, ne in volumen excrescat hæc *Dissertatio*; ablegans ad *Præticorum Libros*, qui tales desiderat. *Cautelas* varias Speciales quæ Ingredientia proponunt hinc inde Medici, quarum quasdam subjungam. Circa Purgantia notant, quod fortiora, & alia, quæ ramosis suis corpusculis intestinorum parietibus facile adhærere, vique sua acri partes nervosas & membranasas pungere, vellicare solent, in petia seu sacculo sint liganda, quò omnis molestia avertatur & præcaveatur; cujus



cujus generis sunt turpethum, sem. carthami, agaricum, (ejus Trochisci) quod utpote villosum in intestina injectum statim circumhæ-  
rere atque affigi scribit *Joh. Schyron*. Meth. Med. p. m. 19. hocque  
confirmat *Zuvelferus* in Animadv. in Pharm. Aug. p. 198. hinc *Vete-  
res* Oximel Clysteribus addidisse, ut protinus illud abstergeretur,  
neque adhærescat, tradit *Idem* l. c. Item Colocynthis, cujus sub-  
tilissima ramenta horrendos cruciatus inferre, & aliquandiu post se  
relinquere, expertus loquitur *Ettmüll.* de Præscr. Form. p. 185. quæ  
licet subtilissimè pulverisata, & in Trochiscos redacta semper tamen  
intestinorum tunicis adglutinatur, teste *Quercetano* in Pharm. Dogm.  
Restit. c. 18. Ita omnes Hieras, ut Archigen., Diacober, hieram  
picram, trochiscos alhandal, diaphænicum, Indum majus, &  
quæcunque turpethum & agaricum recipiunt, in panno ligata deco-  
qui jubet *Rondelet.* de Medic. Int. p. 13. Non semper talia observan-  
tur. Non malè Quidam Rhabarbarum, folia fennæ, & alia Lenien-  
tia liquori summe calido potius infundere, (si mora conceditur)  
quàm in eo decoquere suadent, ne scil. vis eorum Cathartica inter  
coquendum evaporet & deperdatur. Ad Carminantia quod attinet,  
monent Authores, illa non sola in Clysterum decocto esse recipien-  
da, ne tenuibus & subtilibus suis particulis viscidam materiam ni-  
mis attenuando flatuum proventus augeant, majorem hinc in inte-  
stinis producant distensionem, sed semper emollientia, leniter  
evacuantia, demulcentia, intermiscenda imperant. In Emollienti-  
bus aliisque Clysteriis sem. lini, fænugr. psylli, hyoscyami, cumini,  
& alia pingua, viscosa atque graveolentia parca manu pro decocto  
sumi volunt, quia non solum liquorem nimis lentum, glutinosum  
reddunt, quo minus commodè ex instrumenti fistula in anum effun-  
di queat, sed caput simul petunt, suoque nidore replent, fœmina-  
rum uterum commovent, aliis stomachum afficiunt, humores spi-  
ritusque corrumpunt. Circa Opiata dimicant & ambigunt *Autho-  
res*, num illa tutius per os, quam per inferius guttur injiciantur? In  
genere hæc lis decidi non potest. Quòd si extremi in acutis gravissi-  
misque morbis urgent dolores, Opiata ex Clysteribus non penitus  
excludenda sunt, verum non tantum in parca illa adjiciantur dosi,  
sed & benè præparata, cumque corrigentibus, e. g. ol. ruthæ, ca-  
stor. &c. nupta & probe dissoluta eligantur, nec diu in ventre reti-  
neantur; post Clyisma rursum ejectum intestina *Lad. Mercatus* aqua  
aut vino dulci ablui jubet, ne portiones quædam ejusmodi opiato-  
rum plicis intestinorum ob viscedinem suam adglutinatæ adhæreant,



hincque periculum gravioris mali minitentur. Ex 31. opii cum Enemate injecti coma obortum, per aliud verò Clyisma curatum notat *Salmuth*. Cent. 3. obs. 97. Balbutiem ab Opio per Clysterem infuso, post tempus autem vi opii discussa denuo cessantem, observavit *Platerus* lib. 1. obs. p. 127. *Thom. Minadour* Med. & Prof. Italum observasse, omnes Dysentericos, qui ex Consilio Medicorum, Opiatis usi fuerunt Clysteriis, defunctos esse testis est *Frid. Hoffmannus* in *Meth. Med.* l. 1. c. 10. Conf. *Thoner. Obs. Med.* 8. lib. 3. Quæ singula monent cautam prudentiam circa Clysteres Narcoticos requiri. Specialiores in Specialibus Casibus Cautelas Specialis Praxis requirit & docet.

## XX.

Utut autem maxima Enematum sit Utilitas, & tantum non Universalis, ne credas tamen illa in omnibus morbis, nulla ratione habita dispositionis subsectorum, symptomatum, naturæ, temporis periodi, virium constitutionis, &c. semper tutò præscribi posse; imo in multis præfatis casibus, in quibus fuerunt laudata, ubi fortius Contraindicans Clysteres vetat, aliaque impedimenta eorum administrationem dissuadent, rarò felici cum successu hoc medicamentum accersere licet. Cave ergò ut cum vulgo culpam rejicias in utilissimum nostrum præsidium, (sæpe enim saluberrimum remedium Medicastrî, vel ægri, vel aliarum circumstantiarum culpa fieri nocentissimum Venenum, non unius *Autoris* est querela) si funestum post injectum Clysterem, legibus Methodi Medendi non ritè observatis eventum notaveris, uti ex applicato cuidam scorbutica labe infecto in ventris torminibus Clysmate, violentas mox Convulsiones infecutas esse legimus in *Miscell. Germ.* Ann. 3. Dec. 2. Obs. 77. Ita alius Clyster in Iliaca Passione infusus acerbissimos excitavit dolores, cum sanguinis excretionem, apud *Joh. Specht* in *Ephem.* Ann. 9. & 10. Obs. 114. Aliud Enema in eodem affectu applicatum, post semiquadrantem horæ ægrum à vita sustulisse testis est *Andr. Cnöffelius* l. c. An. 3. Obs. 208. Sæpius de talibus casibus judicando committitur fallacia non causæ ut causæ. Impudentissimè autem & sceleratè agunt Circumforanei, qui solliciti magis de suo commodo & quæstu, quàm de ægri salute, in omnibus corporis affectibus promiscuè Clysmata applicare audent, & sine delectu ad illa, ut fors tulit, ignoratis aliis medicaminibus, confugiunt, ex quorum censu fuit ille Circulator, qui spretis omnibus aliis remediis, solo Clysterum usu omnes morbos curare temeraria jactantia *Brixiensibus* promisit, uti quidem ex *Aloisio Mundella* refert *Laudatus Schröck.* in *Schol. ad Helwig.* Obs. cit. Perinde etiam culpam non effugiunt, qui nimia Enematum frequentia Clientes suos miserè torquent; uti Barbitonforem quendam vix octidui spatio ultra centum Clysteres ægro cuidam adplicuisse memorat *Idem* l. alleg. Unde Errores vulgi, nihil corpori ac naturæ infestius, nihilque desperatis in rebus tritius ac inutilius esse arbitrantis Clysmatibus, ab ejusmodi Impostoribus & maleferiatis hominibus originem traxisse affirmat *Mercatus* l. d. p. 64. Sed ne fastidium pariam prolixiori tractatu, rivum claudam; pro concessis hætenus viribus

D E O

SIT LAUS ET GLORIA.